

Regione pastorale "Basilicata,,: modifiche dei confini delle diocesi

Si riporta per documentazione e per opportuna conoscenza anche il Decreto n. 435/65 con il quale vengono definiti i confini delle diocesi che sono state raggruppate nella Regione pastorale della Basilicata.

SACRA CONGREGATIO PRO EPISCOPIIS

PROT. N. 435/65

POTENTINAE ET ALIARUM

DECRETUM

DE MUTATIONE FINIUM

Quo aptius christiani gregis fidelibus consuleretur fieretque Sacrorum Antistitum fructuosior labor, visum est aetatis nostrae necessitatibus congruens ac votis Concilii Oecumenici Vaticani Secundi de aptiore dioecesium territoriorum compositione consentaneum, si quarumdam circumscriptionum territoria in Lucania rectius disponderentur.

Auditis ideo locorum Ordinariis quorum interest et praehabito Conferentiae Episcopalis Lucanae-Salernitanae favorabili voto, sacra Congregatio pro Episcopis rata huiusmodi immutationem in bonum animarum cessuram, vigore specialium facultatum sibi a Summo Pontifice Paulo, Divina Providentia Pp. VI tributarum, praesenti decreto perinde valituro ac si Apostolicae sub plumbo Litterae datae forent, quae sequuntur decernit.

Ut ecclesiastici fines cum limitibus civilium regionum conveniant, eadem sacra Congregatio separat:

— ab archidioecesi Materanensi municipia vulgo *Ginosa et Laterza* eaque dioecesi Castellanetensi adnectit;

— a dioecesi Anglonensi-Tursiensi municipia vulgo *Alessandria del Carretto, Amendolara, Canna, Montegiordano, Nocara, Oriolo, Rocca Imperiale et Rosito Capo Spulico*, quae dioecesi Cassanensi adscribit. Ab hac vero seiungit et dioecesi Anglonensi-Tursiensi aggregat muni-

cipia vulgo *Castelluccio Inferiore, Castelluccio Superiore, Rotonda, Viganello* et paroecias *Agromonte Magnano et Agromonte Mileo*, in municipio vulgo *Latronico* sitas;

— a dioecesi Policastrensi, Ecclesiae Anglonensi-Tursiensi adsignanda, municipia vulgo *Lagonegro, Latronico, Lauria, Maratea, Nemoli, Rivello et Trecchina*;

— a dioecesi Venusina municipium vulgo *Spinazzola* quod dioecesi Gravinensi adiungit;

— a dioecesi Andriensi municipium vulgo *Montemilone* quod Ecclesiae Venusinae unit;

— ab archidioecesi Compsana municipium vulgo *Pescopagano* quod Melphiensi dioecesi adscribit;

— ab abbacia nullius Ss.mae Trinitatis Cavensis municipium vulgo *Tramutola*, idque archidioecesi Potentinae et Marsicensi adnectit.

Insuper quo magis dioecesium fines internae ordinationi convenient, eadem sacra Congregatio statuit ut:

— ab archidioecesi Potentina et Marsicensi separentur et dioecesi Anglonensi-Tursiensi uniantur municipia vulgo *Moliterno et Sarconi*;

— a dioecesi Anglonensi-Tursiensi seiungantur et archidioecesi Materanensi adnectantur municipia vulgo *Craco, Montalbano Ionico et Scanzano Ionico*;

— a dioecesi Tricaricensi distrahatur et Materanensi archidioecesi adscribatur municipium vulgo *Salandra*;

— ab archidioecesi Acheruntina dividatur atque Potentinae et Marsicensi archidioecesi aggregetur paroecia B. Mariae Virginis a Monte Carmelo in pago vulgo *Castelglorioso-Arioso*;

— a dioecesi Murana seiungantur municipia vulgo *Rapone, Ruvo del Monte et San Fele*, eaque dioecesi Melphiensi adsignentur;

— a dioecesi denique Rapollensi distrahatur vicaria curata Immaculatae Conceptionis B. M. V. in pago vulgo *Inforchia* et archidioecesi Potentinae et Marsicensi uniatur.

Statuit quoque sacra Congregatio pro Episcopis, ut una cum territorio municipiorum, ecclesiae adnectantur, oratoria, domus et coemeteria paroecialia, piaae foundationes et quaecumque alia ecclesiastica bona et iura quomodocumque ad paroecias vel ecclesias illorum municipiorum spectantia.

Documenta et acta, singulas de quibus agitur paroecias respicientia, a Curia a qua ad Curiam dioecesis, cui paroeciae aggregandae sunt, tradantur.

Ad Clerum vero quod attinet, simul ac praesens decretum ad effectum deductum fuerit, sacerdotes dioecesi illi censeantur adscripti in cuius territorio beneficium aut officium legitime detinent; ceteri autem

clerici dioecesi illi incardinati maneant vel incardinentur, in cuius territorio legitimum habent domicilium. Uniuscuiusque tamen dioecesis Ordinario fas est —ob congruas rationes — collatis consiliis cum sacerdotibus et clericis quorum interest, aliter de eorum incardinatione disponere.

Ad haec omnia perficienda sacra Congregatio pro Episcopis deputat Exc.mum P. D. Romolum Carboni, Archiepiscopum titularem Sidoniensem, in Italia Apostolicum Nunutium, necessarias et opportunas eidem tribuens facultates etiam subdelegandi, ad effectum de quo agitur, quemlibet virum in ecclesiastica dignitate constitutum, onere imposito ad eandem sacram Congregationem, cum primum fas erit, authenticum exemplar actus peractae executionis remittendi.

Contrariis quibusvis minime obstantibus.

Datum Romae, ex Aedibus Sacrae Congregationis pro Episcopis, die 8 mensis septembris 1976.

+ SEBASTIANUS CARD. BAGGIO, *Praefectus*

L.S.

+ ERNESTUS CIVARDI, Archiep. tit. Serdicens., *a Secretis*